


318
:2



荷亭文集卷之一

東陽盧格正夫著

賦詩

美人賦

若有人兮多姿
蹇幽居兮空谷
浴蘭湯兮沐芳
華扈申椒兮被
姣服掃長斜兮
連娟瞬美目兮
綿邈舞凌波兮
若驚鴻發揚阿
兮振林木儀容
嫵媚舉止閑淑
含情不語顧影
憐獨傷春嬌兮
綺羅悲秋豔兮
珠玉望靈脩兮
何方念徘徊兮
心曲遣鳳鳥兮
致辭恐鳴

鴻兮爭逐悼芳年兮若流悵空房兮獨宿於是蹇修
爲理詹尹式卜脩我衣裳修我膏沐雲旗啓途霞綃
籠燭駕龍斬兮瑤臺薦鳳衾兮金屋托夜光于曜靈
附絲蘿于喬木纂組玉璜曲瓊綉幙絃歌盈耳光采
奪目願舉案以齊眉兮祈婦道之無忤惟貞心之恭
順兮肯溺情于逸慾折瓊枝以爲羞兮薦椒桂於醴
醕樹蘭蕙之繽紛兮恐芳馨之不足裂菱荷以爲衣
兮集芙蓉於綉褥豈艷質之取憐兮納靈脩於戩穀
照燭籠於洞房兮懸明月於帷幄光無遠而不達兮

明無幽而不燭援圖畫以陳規兮誦德象而啓沃戒
狂夫之亂紀兮步哲人之芳躅樂秋夜之未央兮恐
禍機之潛伏聞蒼蠅之有聲兮恍晨雞之呶喔覽樛
木之逮下兮景哲后之綏福將齊名于汗青兮肯合
汚於流俗惟陰陽之調和兮啓萬物之發育處夫君
於極休兮保赤子之多祿暢一氣之流通兮扇

皇風之清穆象日月之貞明兮振終古而莫續亂曰乾
坤定位男女生兮竒偶相合夫婦成兮聖人設教順
以貞兮至人則之風化行兮德音孔昭願服膺兮金

石不朽終古榮芳

慶黃門徐希曾母壽詩

吾鄉有賢母少號閨中良
婉婉德爲潤肅雍禮自將
中年喪所天守義齊共姜
寒月吊孤影青苔生洞房
貞心貫金石清操厲冰霜
熏沐采蘋藻辛勤奉姑嫜
詩書課兒曹紡績供衣裝
願言兒進學逝者猶不亡
斷機示明訓剪髮豈自戕
一朝天風起鳳雛奮飛翔
苞彩耀千仞德音昭四方
口啣五色線虞廷補衣裳
台斗明

宸極風雲繞建章
顧茲心耿耿仰視春暉光
慈烏依南枝青鳥啼北堂
目極不可到情至空徬徨
吾聞孝卷志寧庸守其常見
名光赫赫親樂自洋洋
孟子成大賢母德垂無疆
羊祜服慈訓仁聲江漢長
人生貴宏達德業須顯昂
上增日月輝下掃華夷糠
僉曰賢哉母教子誰與行

皇恩照玉卮 聖澤流瑤觴
大啓八荒慶永垂千載芳
斯爲養親志無忝名賢鄉
我歌阿母前母喜云勿忘
輓侍御曾光表雙親詩

斗南有佳士居然文獻邦讀書數行下作賦鳴琳瑯
一朝探月窟兩袖飄天香十載遊辟雍席珍講虞唐
九重廣耳目濟濟登賢良水斧越南臺聲名獨擅場朱
衣耀赫日白簡飛秋霜發奸動神鬼理獄敷春陽僉
期作霖雨雷聲普八荒天胡不憖遺二豎入膏肓從
此鷲分影淒風冷綉裳共姜汎栢舟秉志樹綱常皇
皇二十載閨闈有餘芳忽重霧脩念追隨上帝鄉青
山兩埋玉艸木生悲傷巫陽招不起行人空斷腸我
言君莫嘆天道豈茫茫令子繼芳躅奎光表四方卽
今秉憲節擊鵠摩穹蒼乘驄羨桓典埋輪見張綱卓
哉廊廟器備矣邦家光于公昌厥後三槐蔭二郎天
意固有在善人豈云亡我歌佳城下彷彿蒐來翔悲
風動林木陰雲護高岡願言螽斯羽世德垂無疆

和王公旦大尹韵

世有九方臯乃有千里馬紛紛肉眼徒寧識媿與好
卓哉道州子心勞署下考亦有鸞鳳姿棲遲枳棘道
見此重懷人夢寐愁絕倒山盡日歸晚江空月出蚤
沆瀣接淪陰飲之不能飽適有同心友吟詩論拙巧

奇語響琳琅壯志塞穹昊

當宁重民牧循良正爲寶中牟終大用褒德未云老慷慨樹勲業英雄豈枯稿勉矣勿他求我言非艸艸

避暑

避暑竹軒下軒窓映竹開石床有餘凉水簟無纖埃清風如故人颯然自南來啼鳥亦知心勸我頻啣杯世事奕棊爾何用先驚猜君看有道者皎如明鏡臺

江行二首

薄暮發江漣行行意若何明月揚清輝涼風起微波

臨流不能寐自飲還自歌明朝至堯城塵事依然多夜闌酒初醒風物無限情松壑發靈籟蘭槩擊空明徘徊復徘徊懷抱一時清何當跨黃鶴王喬同一成

詠蘭

蘭爲王者香不與衆芳伍清風滿幽谷紅塵絕淨土桃李多世態穠艷自非古松竹含晚姿孤高不同譜蒲柳及槐榆閒來隨意數荆棘雜蕭艾左右作奴虜美姝出南國儒風盛東魯魯叟亦作操意深聲更苦一朝獻靈修觀者沓如堵芳馨感鬼神明德動天府

顯相維辟公奔走盡簪組湘纍喜而笑虞兮竟羞舞
百祿以日增四方以無侮終古有餘芳厥施非小補
此言如不信請子端章甫

詠海棠

春風二月初杜牧楊州過第誰作蹇脩姑射納奇貨
桃李齊致勝鶯燕爭云賀香分青瑣情艷點碧山唾
華清睡未足巫山夢初破倚翠默無言含情泪偷墮
不怕香塵擁卻嫌脂粉沓一月日邊明二人土上坐
共誇傾國姿誰云委泥禍一朝風雨惡空招杜鵑些

回首問東皇願言覓良佐陽春無冶容歲寒靡摧挫
德全愈不形曲高彌寡和虞廷來鳳凰青青玉千箇
壽黃門張經載母六十

西江張氏母展也閨中鳳賦性既貞淑宅心復慈良
一從鸞影幻栢舟誓不忘殷勤潔蘋藻婉婉事姑嫜
婦道今誰似母儀夙有常和丸頻訓示截髮供酒漿
持金比昭母泣杖見韓郎一日春風起雛鳳鳴高岡
文彩煥九苞德音中八方粲粲昭雲漢翩翩爛天壤
出入直禁闈染翰侍

君王官物無遺奉貧乏每揄揚

天子推孝理畫錦還故鄉丹楓映玉卮黃花泛瑤觴王
母亦西來霞光藹北堂綵衣舞蹁躑猶帶御爐香問
之何因爾積善天降祥來歲沐

恩波寵褒用是彰花甲從新數迓禧詎堪量我辱賢郎
交遙瞻喜欲狂作詩寄太史壺範垂無疆

戲荅張宗器

昨辱使上門嘉惠二祗候常祿義無辭素餐顏孔厚
多財益我過無肉令人瘦持此問先生囊空且登受

送弟敬夫會試

昔者二難并文章耀儒服今朝雙鳳飛光彩奪人目
江亭雨初霽天宇清可掬唱徹驪駒歌風動征帆速
神州在何方祥雲護金屋三策

當宁獻燦燦珠千斛策馬出長安恩袍照春祿曲江花
似錦閨苑人如玉十里沸絲簧輪蹄競馳逐書生際
亨運素願良亦足炳炳一寸丹何如詹尹卜匪爲賈
聲華豈曰媒利祿稷契事堯舜願言繼芳躅

秋晚

乘閒河澣畔秋色忽相磨落日明遠浦西風湧微波
何處釣船歸老翁酣且歌隔林吹短笛牧牛下前坡
竹外酒旗斜曲闌發楊阿數聲歡未足艷艷朱顏醜
誰家遊冶郎綠楊映新羅挾彈落飛鳥指日揮天戈
我本倦遊客芳辰屢蹉跎對此情不已詩思如懸河
白鷗忽相親羣飛馬前過何當與汝盟酌酒呼天和

秋宵

秋宵不成寐輕風透疎櫺攬衣起開門宿鳥花間鳴
徘徊天宇闊河漢淺且清雙星隔幾許默默終宵情

我欲徃從之八翼凌風生慈烏夜半啼惕然壯心驚
呼酒且盤桓浩歌山月明東白出門去兩峯相對青

荅馬國器

昂藏八尺身骨相絕無倫一入飛龍廐生憎指鹿人
九門驚製電千里見揚塵伯樂方能顧先生且莫嗔
題陳處士遺安堂

好爵肯纓情黃金不滿贏貽謀最深處方寸子孫耕
和韋蘓州詩三首

夜卧虚寂堂月明見肅客精光射斗牛爽氣透金石

經史開古今陰陽自朝夕何處覓行蹤心虛本無迹
終日藕花亭寶養千金客積案盡詩書盈箱半藥石
陽回艸木春歲晏霜露夕去去竟何之前脩有遺迹
採芝終南山雲間見木客借問祖龍時程書幾衡石
黔首亦何辜朝憂不及夕鷓鴣爲誰殿關河俱漢迹

悼亡

聚散不可期脩短那能計原從無中來還向無中去

蚤行次溫廷筠二首

蚤行天未曙渺渺水雲鄉楊柳梢頭月芙蓉葉上霜

驚鴻過別浦宿犬出頽墻隔岸誰將火晨炊汲野塘
晨起理梳洗西風出故鄉雞鳴海底日人立渡頭霜
落葉亂鋪路橫枝低拂墻馬行俄躍足野水入芳塘

幽居次賈島韻

迂叟愛幽靜清風歸故園懸崖連石室流水遶柴門
月出花生影雲消樹露根此中有真趣難與俗人言

閒卧次白樂天韻

林泉閒適性非敢自沉淪孔子盛時夢羲皇以上人
乾坤雙醉眼風月一吟身久卧朔風惡寧容戴角巾

次韵孟浩然歸終南

四海混車書先生一艸廬石泉時滴溜松竹亦蕭疎
俗塵或飛到清風自埽除月明閒讀易觀象看盈虛
次韵魏野題屋壁

野際承平世胡甘飲石泉豎貂方偃月魏絳未凌烟
官裡無多味山中不計年達人知物理莫笑是真偏

春望次杜子美韵

三月風光好吾人意獨深百花爭畫錦寸艸自春心
案有陽秋筆門無暮夜金驕兒共梳洗笑看二毛簪

古戰場次竇庠韵

衛青絕大幕竇憲焚龍庭日暮沙猶白春深艸未青
斷碑無顯字折戟有餘腥我願邊塵息中和致四靈

王荆公墓

次曾子開韵

神考喜求才鄞江縣尹來周官方講舉宋室半傾頽
旭日扶將旦陰雲撥不開非門誰啓鑰沙漠有餘哀

獨坐

次任伯雨韵二首

環居萬竿竹日日來清風花落鳥鳴樹水流雲在空
精心思物理妙句奪天工真樂自生色何須借酒紅

山居靜無事獨坐看屏風
流水浴明月危峰插太空
乾坤多美景圖画亦良工
未盡圖中景祥雲捧日紅

題何菊逸壽星圖

遙望卿雲鄉南極降殊俗
翩翩一鶴來乾坤清可掬
問之因何爾作善天錫福
商山松栢青謝晚芝蘭馥
題詩昭瑞圖聲華動天祿

偶題屋壁

丈夫寧非夫偃蹇時不利
面目若短光語言亦少味
一旦躋亨衢雲龍風虎遇
勲名格宇宙慶澤及苗裔
眷言莘渭翁湯文乃知己
一德位元功流芳千萬世

秋宵

秋宵不成寐扶杖啓柴扉
雨霽魚頻躍風恬鶴未歸
攜朋談妙理步月挹清輝
嗟彼營營者寧知造化機

嚴子陵廟

輕風揚錦帆明月過嚴灘
寤寐芝蘭志徘徊冰玉顏
身在烟波中名滿天地間
眷言光武聖先生行其難
花落鳥不競水流雲自閒
嗤彼晉蔡謨絕迹亦躋攀

題靜庵

有美一人兮中州青山綠水兮夷猶鳥不鳴兮山幽
幽風不波兮水悠悠天無言兮春復秋達人知命與
造物者游

石洞書院

石洞建書院山川著美譽歸雲三徑暗斜日半窻虛
澗水鳴新樂岩藤學艸書昔年山下路春雨長園蔬

富春驛

停舟富春驛閒上望江樓牧笛千家晚蘆花兩岸秋
驚濤奔白馬亂石浴烏牛去去應何所紅雲繞

帝州

元宵

連朝風雨惡今日喜新晴未論夜燈好初看春月明
金吾應弛禁玉漏莫傳更歲歲長如此光陰不負生

寒食

寒食出山前誰家掛紙錢牛羊青艸地風雨杏花天
介子不言祿國人空禁烟至今汾水上猶自恨綿綿

端午

乘風過湘水舟人競渡諠蠅口惑昏豎魚腹埋忠魂

浩浩波濤黑悠悠日月昏誰知千載後

大明麗乾坤

中秋

今夜好明月萬戶朱簾捲
非海樽不空南樓興非淺
美人激清歌才士騁雄辨
愛此情不已持向吾

君獻

重陽

老翁不計年登高已盈百嶺上招野賓
雲間見仙客
頻看竹葉青不愛梨花白扶杖過前山
羣羊化爲石

龍溪

五月龍舟競年年願不違輪蹄紛似織
舟楫去如飛
艷采明羣目驚湍動釣機誰家好龍種
奪得錦標歸

過貴溪掛榜山

公餘訪遺逸策馬東南出岩瀑響潺湲
新篁弄疎密
共說山掛榜不用峯如筆維嶽時降神
生才斗南一

贈杜雲洞公運

策筇雲洞山山深茂花竹中有隱君子
結屋山之麓
寒暑一敝裘饗殮惟脫粟漠漠不外求
欣欣常自足

問之何因爾腹內蘊珠玉誰家耀綺羅誰家厭梁肉
不義而富貴禍凶相倚伏緬懷陋巷顏千載有餘馥

題張國賓雲山

白雲多變態青山不改形達人妙天機自扁非華名
動靜有定理久速寧足驚願言企前哲千載有遺榮

題潘守綵衣重慶圖

一大江有一士颯颯復昂昂讀書蘊山海作賦鳴琳瑯
一朝啓闔闔三策奏

義皇

帝曰來汝嘉民牧須賢良斬水布仁政視民如有傷頌
聲藹鄰邑芳譽播荆壤獻績居上考

玉音重掄揚超遷金華守婺星耿耿光八邑沛甘露千
里敷春陽夙夜永終譽寧容思故鄉丹山羣鳳雛羽
翼成文章遡風紛屢舞望雲天一方丹青解至情繪
圖昭休祥禁苑天葩茂謝庭玉樹芳良辰試披閱瑞
氣藹華堂孝思惟在目庶幾慰衷腸吾聞范文正佐
宋居廟廊純仁固辭邑跬步不能忘父忠子克孝精
誠格上蒼巍巍兩相業千載垂馨香今君賢文子令

德實與行皇天鑒不忒福祿來未央譬如鄧林木蔽
雲千尺強榱桷豈堪留終當作棟梁譬如荆山璞鬱
鬱含珪璋琢成瑚璉器宗廟供蒸嘗寒予非浪誇多
君請自詳根盛未必茂源深流益長願言純不已世
德垂無疆

水竹幽居過丹陽有感

誰家傍小洲風景四時幽初日青珩照明霞碧玉流
吟成裁鳳管睡起覓漁舟機靜塵勞息何心萬戶侯

晚馬逢源父母

祥雲護舊居高士竟何如絳帳春無際青衿樂有餘
松風鳴籟遠梅月映窓虛教子成賢哲舍怡返太初
何年青鳥啼晏罷竟忘歸月冷梁鴻案塵迷孟母機
落花春雨寂荒艸暝烟微吟斷蓼莪句賢郎泪滿衣

問弟直夫索梨

昨欲還我書一書紙千幅何如代以梨一書梨一斛
去歲尚纍纍今年多可卜樹上大如斗席間珍似玉
金刀切處液流泉一片下咽冰沃腹煩渴解兮沉疴
痊月白風清思爽然短章未足致予意明朝更賦雪

黎篇

慶張榆秀才母壽

卓哉張氏母不與凡母俱孀居三十載貞心鐵石如
構書課諸子剪髮延名儒淑德光閨闈芳名動里閭
流年越花甲炯炯璠璣姿宗戚稱觴罷兒孫戲綵餘
齊祝阿母壽艸心報春暉明年叫閭闔

恩光下庭闈

贈別駕鄺侯

有美鄺侯溫乎如玉斯民父母斯文骨肉軒車至止
民歸如簇侯命勿驚俾爾戩穀按籍清戎月照空谷
民貢繭絲舊或未足侯命勿亟俾查案贖舊役未償
新役難續墨吏侵欺良民繫獄匪彼罪尤乃我荼毒
陽子良謨科拙愛篤孔門明戒見小欲速民聽德音
歡震比屋僉曰我侯春臺玉燭

天子愛民俾作良牧何以報之率封三祝
徵書莫來我民之福

送劉太監歌

有序

成化甲辰秋七月鎮守江西司設監太監劉公奉

勅移鎮兩廣挽留不可人心皇皇分巡僉憲莊公於是
俯命按屬採拾民風以送之切惟古之仁人君子
按治一方而民愛之如父母敬之如神明去則遮
道留之至沒世而不忘者夫豈聲音笑貌云乎哉
蓋必有所以爲之者矣劉公受

命鎮藩幾及十禩孜孜奉國知無不爲以寬厚待民以
恩禮待士夫而左右近習未嘗有挾勢而生事者
士民被其德而安其治也非一日矣今而改鎮他
藩澤不終究則夫士民傷悲不已之情發於嗟嘆
詠歌之餘者固其所爾因采其大意而爲之歌曰
有美人兮邦之媛被圭璧兮紉蘭荃羌含睇兮空笑
善窈窕兮增妍奉

玉音兮南國發桂棹兮洪川迥洄從之兮道修阻舉頭
仰望兮空雲烟隰有芳兮泚有香懷美人兮不能忘
願言相夫君兮均德音於四方

戲三同寅懼內無子

陰盛則陽伏內重則外輕河東獅子吼響馬寂無聲
文豹應潛竄寒雞不敢鳴隔牆鶯燕笑連浦鴛鴦驚

我聞夫爲天何事常戰兢三綱壹以弛萬化何繇成
婦性雖妬忌法語可開明專寵眼前樂無兒身後爭
樛木能逮下千古垂芳聲若得陰陽和會有鶯鷲生
他日過孔門共看鯉趨庭

送鄱縣尹陳良貴之任

曉捧除書出

帝鄉春風花柳送行裝從今刀劔爲牛犢自古鷹鷂下
鳳皇莫惜三年勞撫字要知千載數循良他時獻績
歸金闕明月清風一樣光

壽侍御王克承母

豸冠貴子榮歸日象服慈親初度辰彩鳳玉麟誰不
羨瑤花琪樹自長春雲開南極光芒燦雨過東山景
物新豈是蒼蒼私着意由來作善屬吾人

和王內翰韵

玉帛衣冠列大賢芳心何事轉凄然常期立德垂千
載誰謂偷閒過十年管樂才名猶不泯伊周事業豈
虛傳咨諏賴有金蘭契拱北台星正纒連

題李世南東李十詠卷

禾黍離離九月秋朔風吹雪洒西州江南王氣知無
幾宇內真元可暫休顏氏一門并伏節李陵千載尚

含羞思賢幾度瞻遺象明月清風滿画樓右詠一門忠義

花萼相輝映浙東誰言江右老陳崇金枝玉樹幾千

本瑞色天香一樣同雙崑峯巒涵秀氣百年禮樂園

春風化行薄俗如堪振蕩蕩堯天屋可封右詠四世同居

莫看東風花柳春歲寒松柏見天真宮腰國色空中

盡雪幹霜枝分外親不惜鬱盤先斧鉞獨留偃蓋拱

星辰歌殘棠棣重回首盜賊原來亦是人右救兄感賊

嘗謂靈椿歲八千松風一夜動衰絃杖身九死嗟何

贖泣血三年敢自憐赤兔白烏馴艸舍醴泉甘露滿

芝田東風回首猶堪慰萱艸非堂春正妍右盧墓養母

俯仰乾坤酒百杯堂堂歲月去還來蒼梧翠竹無邊

趣白石清泉絕點埃日暖波心魚潏刺月明松頂鶴

徘徊丹心不廢君臣義諸葛原非異世才右辭辟隱居

默然一念格天神何用人前伐此身子產辭圭因得

寶晉公還帶為安仁春陽出海無邊景秋月當空絕

點塵莫道陰功無顯報多冠象簡是何人右還金泯跡

從來五福壽為先
泡沫風燈豈易全
不見三千亡是叟
嘗聞七十古稀年
青鸞彩鳳分番舞
紅杏碧桃取

次妍謾羨一門仁
者壽滿庭瓜瓞更
綿綿右叔侄者願

孤鸞半世守空林
何事鷓鴣又獨吟
流水無情紅葉

遠洞門有限綠苔
深峴峯竝秀千季
景風月雙清萬

古心寄語當朝賢
太史栢舟誰復嗣
徽音右母子雙節

理學淵源何處同
民彝天理古今同
只因小道多岐

路遂使真元蕩太
空洙泗宮墻非飾
外濂閩脈絡本

由中湧誰引入金
華路一道奎光照
崑東右先朝理學

古道功名豈易全
曾於班馬見遺編
業真無

忝管晏才華僅可
傳不向長江誇巨
浪須從活水探

真源吾邦喜有簪
纓族自宋于今五
百年右當代功名

庚申年五月七日有感

蘭湯浴罷北窓眠
忽聽晨雞思惘然
宣父一加知命

歲孫郎三倍渡江
年光陰冉冉空回
首事業悠悠不

問天寄語碧桃花
下客江南風月屬
吟鞭

喜雨

夢覺吟窩逸興長
不因宋玉賦高唐
氣蒸竹院琴書

潤聲入荷池枕簟涼彌望江山都改色四郊禾黍倍
生香須臾雲散知何處赫日當空照萬方

次趙尚新韵 六首

蓬萊絕頂鬱崔嵬闔闔遙開見上台舉首便堪扶白
日回頭不用拂黃埃月中丹桂紛紛落天上銀河滾
滾來堪笑風流謝公子偶逢小景便徘徊 右方岩

我愛西方萬歲山乘虬跨鳳不辭煩四時剩有雲霞
吐千古常將日月吞仙鶴凌風歸洞府神龍帶雨出
天門箇中盡是惺惺地不用烹茶醒醉魂 右壽岩

老幹參天數十圍東封不受祖龍欺愁聞汴水栽官
柳悶聽甘泉奏瑞芝雪蒲鄧林春意蚤雲深商嶺曉
光遲兔絲千尺神苓見壽國安民正及時 右松岩

誰識磻谿老釣翁得魚沽酒醉春風偶來牧野閒揮
劍笑入天關不用筇出納風雲猶掌運古今人物可
誰同興來卻上危樓望月落潮平水正東 右八十

放鶴山前看白雲牧牛隴上教兒孫兒孫各有田方
寸種得熟時珠滿盆 右傳耕

君不見東方有山高甬天勢與清都紫府相牽連上

有翠竹蒼梧崢嶸捧日月下有丹崖紫石杳藹棲雲
烟羽衣山人未識山中趣空將朝霞沆瀣稱客遂至
清母滑菟自然一氣孔神中夜禪無爲之先天作旅
黍初重開我爲主山人胷中無所有只說水桃與雪
藕涎口何曾得一食揚眉便欲誇悠久我今勸君莫
登山山上荆棘生滿巔直須乘龍跨鳳逍遙天地間
特與東方美人玉貌爭一先

右登山歌

送人宰邑

代作

鹿鳴聲價重儒林初拂琅玕拜

玉音謾道徐生空擊鼓須知宓子善鳴琴滿城桃李春
一風蚤四野桑麻夜雨深他日政成應大用洛陽赤子

愛棠陰

輓于時俊母封太孺人

繞承

恩命出 金鑿何事仙遊竟不還舉案無塵遺則遠斷
機有樣後人看秋風未夜吹慈竹春雨何年沐瑞蘭
哭罷賢郎尋往事手書旬日報平安

輓鄭尚寶母

榮拜

封章壽古稀霞帔鶴髮自相輝
歌殘金縷方多慶宴罷
瑤池竟不歸花落閒庭春晝靜
艸深高塚夕陽微賢
郎最是傷心處手澤猶存舊製衣

輓霧溪陳處士

久仰高風未識荆銘文讀罷見平生
世傳陳兢有家
法盜畏彥方知姓名遼海鶴歸知幾歲
越山猿喚過
三聲行觀採入觀風者耿耿芳名照汗青

送田巡檢考滿

嫋嫋西風湧碧波送君南浦意如何
三年清議騰絃
誦千里深情逐棹歌霜滿竹林天色朗
雨餘花塢月
明多誰知璞玉藏良價要向朝端問卜和

贈高都憲

得來字

都憲先生遊勝地侍御諸賢盡日陪
啣杯不問白日
速吟詩且促黃花開泛楫中流波弄影
策馬古道風
揚埃道傍兒童拍手笑笑指淵明歸去來

中秋翫月

次高都憲韻

十二珠簾暮不垂一城絃管樂明時
碧天絕翳月千

里丹桂輪香花滿枝且向花前同酩酊謾勞月下問
盈虧此天此夜應長好不用臨文歎別離

水竹幽居

次杜公運韵二首

一溪流水竹千窠富貴浮雲奈若何紅浪拍堤魚鳥
狎綠陰滿室鳳鸞多涵天浴日容非小傲雪凌霜操
不磨長嘯一聲雲漠漠何人扣角下前坡

清溪翠竹遶山窠半世忘機奈樂何碧浪平時雲影
靜綠陰盡處月明多源頭活水時流出林下清光耿
不磨寄謝非熊休叶卜此生無分到鸞坡

感興

次前韵

水竹蕭蕭一蟻窠天生我欲如何風寒砂磧貔貅
聚日暮林巒虎豹多懶把金樽邀月飲直將寶劍倚
天磨明年策奏

重瞳喜萬騎弓旌出禁坡

過先兄故居

故居寂寂逕苔深痛憶先生淚不禁芳艸一庭隨意
綠寒蛩四壁爲誰吟碧桃紅杏年年景明月清風夜
夜心惆悵英魂何處去數聲啼鳥隔花陰

梧州遇漲

午夜巒江春水生瀾漫直與曉山平衝崖擊石千雷
震浴日澄空一鑑明潛底蛟龍爭奮迹吟邊魚鳥不
知名滔滔東逝應何意要與滄溟集大成

和同年李啓東韻

同醉瓊林十八秋相思時倚夕陽樓物華轉眼渾無
定天運循環不暫休雲過列星皆北向潮平江漢又
東流寄言獨樂園中叟安石東山爲國謀

和潘二守三首

循良事業一番新千里爭得有腳春日暖桑田馴魯
雉風和芝圃見周麟匡時直欲安黔首食祿原非樂

此身寄語當

朝賢宰相廟堂須用讀書人

其一

十載乘驄客

帝鄉朝朝執法侍

君王從攜白簡歸衡舍空有丹心遠建章終日相親

惟藥石經年散處不冠裳殷勤好是賢

明佳句緇衣

遠見將

其二

佳句緇衣久未酬東人忽報衮衣畱花含清露如沾
惠柳拂輕烟似障羞窮谷謾勞傳玉燭芳名只恐覆

金甌蹇予亦有芝蘭志願逐香輪作勝遊 其三

和石通府韵

牧圉台司一樣修休嫌棟宇半擡頭也知六政能馴
虎何必三春學問牛龍卧不因風浪險鵬搏豈爲稻
梁謀天生豪傑應何似佇看棠陰遍九州

贈節判謝君之任 有序

謝先生弋陽望族也德器宏遠學識淵源累不第
于有司乃循例入太學茲拜湖廣之桂陽節判道
出東陽見邑民稱頌令器謝侯德政自信庭訓有

徵喜動顏色遂欲以其訓于子者推于州吾知桂
陽民之受福亦如吾民之受福矣詩以道之

水壺玉樹絕纖塵碧艸綠波相映新曾憶鄴封知世
胄又從傾蓋識天真滿城桃李家家曉千里絃歌處
處春他日 天書詢美政東陽孰與桂陽民

送人會試

梅花亭上雪初晴唱徹陽關息不勝兩岬好山供祖
帳一溪流水送行旌丹墀獨對三千字 金殿俄傳
第一聲他日宦成何所見麒麟閣上見芳名

悼孔雀 時有孔雀被人殺

飲啄東園自在飛誰知一夜落危機空留短翠沾塵
土無復團金耀夕暉蝴蝶驚魂頻入夢杜鵑啼血不
如歸哀音若寄南賓雁應有騷人淚染衣

讀易

曾向包羲問太原河圖爲後易爲先胚胎六合無窮
理包括羣黎日用天三聖若專尊卜筮宣尼何用絕
書編獨憐數易非吾易只把著龜紹正傳

慶謝侯生子

鬱葱佳氣藹門閭鳳穴新看得鳳雛不用章庭占玉
象定從 漢闕佩金魚斷機孟母賢無敵治獄于公
慶有餘我欲登門試英物只愁泥醉素人扶

和艾司訓望雲韻

泮宮積學幾悲秋寸艸春暉志未酬方舉板輿隆孝
養爭如桂棹不停留管絃有恨聲相逐竹樹多情翠
一欲流極目鎮江江上路白雲離思共悠悠

趙安人李氏輓詩 有序

節婦趙安人李氏爲侍御公之子尋之中表兄嫂

也予少育于姑夫芝山翁家與安人之子沂俱在
髫鬢相與出入嬉戲以故得侍慈顏而安人亦愛
予若子迄今垂五十載德音耿耿不忘沂姪徵詩
因序其畧于右執筆之頃凄然者久之

物換星移數十年銘文讀罷淚潸然從夫不貳共姜
節教子成名孟母賢鳳去臺端花寂寂牛眠隴上艸
芊芊只今太史書貞烈佇看 恩光賁九泉

同謝侯遊東峴

邑侯邀我訪山霧同上東峰第一層黃鳥聞關如有
約白雲變化更忘形水從石竅鳴瑤珮風向松林舞
翠屏分付山僧牢着眼他年信筆說吾曾

送葉節推考滿

仗劍登舟氣若虹遙瞻天表日輪紅從來只啣雙溪
水此去無慚七里風南國多人歌召伯漢庭有日相
于公嗟予莫勸陽關酒空向江流憶去踪

壽鄭侯太宜人

黃堂令子過家日閨苑慈親長壽辰彩鳳聲連瑤珮
響碧桃花映錦袍新儒林詞翰岡陵祝綺席芳馨水

陸珍試問韶光寬幾許，封章三賁太夫人。

送醫訓陳節之歸義烏

春風聯轡謁通明，又見承恩出鳳城。
卮酒話分亭柳細，寸心歸壽馬蹄輕。
雲飛東海家千里，人倚西樓笛數聲。
嗟我懷親歸未得，夕陽回首思沾纓。

題葉氏壽萱卷

天理民彝久喪真，紛紛逆子獸爲鄰。
良金美玉專隆已，糲食粗衣卻奉親。
冷地椿萱空自老，載途荆棘逐時新。
吾鄉喜有詩書族，孝弟相承示子孫。

